

სსიპ – სამოქალაქო ავიაციის სააგენტოს დირექტორის

ბრძანება №96
2017 წლის 14 ივნისი

ქ. თბილისი

მგზავრის გარდაცვალებისას/სხეულის დაზიანებისას, მგზავრის გადაყვანის ან/და ბარგის გადაზიდვის შეფერხებისას, ბარგის დაკარგვისას, დაზიანებისას ან განადგურებისას საჰაერო გადაყვანა-გადაზიდვის მოწმობის მფლობელის მოვალეობების განსაზღვრის წესის დამტკიცების შესახებ

„საერთაშორისო საჰაერო გადაყვანა-გადაზიდვების ზოგიერთი წესის უნიფიკაციის შესახებ“ მონრეალის 1999 წლის 28 მაისის კონვენციის, „ერთიანი საჰაერო სივრცის შესახებ საქართველოსა და ევროკავშირისა და მის წევრ სახელმწიფოებს შორის“ შეთანხმების და საქართველოს საჰაერო კოდექსის 75-ე მუხლის მე-2 ნაწილის საფუძველზე, **ვბრძანებ:**

მუხლი 1

დამტკიცდეს თანდართული „მგზავრის გარდაცვალებისას/სხეულის დაზიანებისას, მგზავრის გადაყვანის ან/და ბარგის გადაზიდვის შეფერხებისას, ბარგის დაკარგვისას, დაზიანებისას ან განადგურებისას საჰაერო გადაყვანა-გადაზიდვის მოწმობის მფლობელის მოვალეობების განსაზღვრის წესი“.

მუხლი 2

ბრძანება ამოქმედდეს 2017 წლის 1 ივლისიდან.

სსიპ – სამოქალაქო ავიაციის
სააგენტოს დირექტორი

გურამ ჯალაღონია

მგზავრის გარდაცვალებისას/სხეულის დაზიანებისას, მგზავრის გადაყვანის ან/და ბარგის გადაზიდვის შეფერხებისას, ბარგის დაკარგვისას, დაზიანებისას ან განადგურებისას საჰაერო გადაყვანა-გადაზიდვის მოწმობის მფლობელის მოვალეობების განსაზღვრის წესი

მუხლი 1. მიზანი და მოქმედების სფერო

1. წინამდებარე „მგზავრის გარდაცვალებისას/სხეულის დაზიანებისას, მგზავრის გადაყვანის ან/და ბარგის გადაზიდვის შეფერხებისას, ბარგის დაკარგვისას, დაზიანებისას ან განადგურებისას საჰაერო გადაყვანა-გადაზიდვის მოწმობის მფლობელის მოვალეობების განსაზღვრის წესის“ (შემდგომში „წესი“) მიზანია საჰაერო გადაყვანა-გადაზიდვებისას ავიაგადამზიდველის/მომსახურე ავიაგადამზიდველის მოვალეობების განსაზღვრა და სათანადო კომპენსაციის გაცემა შემდეგ შემთხვევებში:

ა) მგზავრის გარდაცვალებისას/სხეულის დაზიანებისას;

ბ) მგზავრის გადაყვანის ან/და ბარგის გადაზიდვის შეფერხებისას;

გ) ბარგის დაკარგვის, დაზიანების ან განადგურებისას.

2. წინამდებარე წესის მოქმედება ვრცელდება:

ა) საქართველოში რეგისტრირებულ ავიაგადამზიდველზე, რომელიც ახორციელებს საჰაერო გადაყვანა-გადაზიდვას საქართველოში, საქართველოდან სხვა ქვეყანაში, სხვა ქვეყნიდან საქართველოში, უცხო ქვეყნებს შორის, მონრეალის კონვენციის შესაბამისად.

ბ) უცხო ქვეყნის ავიაგადამზიდველზე, რომელიც ახორციელებს საჰაერო გადაყვანა-გადაზიდვას საქართველოში, საქართველოდან სხვა ქვეყანაში, სხვა ქვეყნიდან საქართველოში.

სსიპ – სამოქალაქო ავიაციის სააგენტოს დირექტორის 2017 წლის 29 სექტემბრის ბრძანება №157 - ვებგვერდი, 02.10.2017წ.



მუხლი 2. ტერმინთა განმარტება

1. წესში გამოყენებულ ტერმინებს, ამ წესის მიზნებისათვის აქვს შემდეგი მნიშვნელობა:

ა) **ავიაგადამზიდველი** – საჰაერო გადაყვანა-გადაზიდვის მოწმობის მფლობელი;

ბ) **საქართველოში რეგისტრირებული ავიაგადამზიდველი** – ავიაგადამზიდველი, რომელსაც მინიჭებული აქვს საქართველოს შესაბამისი უწყების მიერ გაცემული გადაყვანა-გადაზიდვის მოწმობა;

გ) **მომსახურე ავიაგადამზიდველი** – ავიაგადამზიდველი, რომელიც ახორციელებს საჰაერო გადაყვანა-გადაზიდვებს მგზავრთან გაფორმებული ხელშეკრულების საფუძველზე;

დ) **კომპენსაციის მიღების უფლების მქონე პირი** – მგზავრი ან ნებისმიერი პირი, რომელსაც გააჩნია მგზავთან დაკავშირებით კომპენსაციის მოთხოვნის წარდგენის უფლება მოქმედი კანონმდებლობის შესაბამისად;

ე) **ბარგი** – რეგისტრირებული და/ან არარეგისტრირებული ბარგი;

ვ) **ნასესხობის სპეციალური უფლება(SDR)** – საერთაშორისო სავალუტო ფონდის მიერ გამოშვებული საერთაშორისო სარეზერვო აქტივები, რომლებიც ნაწილდება მის წევრ-სახელმწიფოებზე კვოტის პროპორციულად;

ზ) **მონრეალის კონვენცია** – „საერთაშორისო საჰაერო გადაზიდვის ზოგიერთი წესის უნიფიკაციის შესახებ,“ რომელიც ხელმოწერილ იქნა მონრეალში 1999 წლის 28 მაისს.

2. ამ წესში გამოყენებულ სხვა ტერმინებს აქვს „საერთაშორისო საჰაერო გადაყვანა-გადაზიდვის ზოგიერთი წესის უნიფიკაციის შესახებ“ მონრეალის 1999 წლის 28 მაისის კონვენციით და საქართველოს კანონმდებლობით განსაზღვრული მნიშვნელობები.

მუხლი 3. კომპენსაციის წინასწარი გადახდა

1. საქართველოში რეგისტრირებული ავიაგადამზიდველი ვალდებულია, კომპენსაციის მიღების უფლების მქონე პირის ვინაობის დადგენიდან დაუყოვნებლივ, მაგრამ არაუგვიანეს თხუთმეტი დღის ვადაში, წინასწარ გადაიხადოს თანხის ნაწილი მიყენებული ზიანის პირობების გათვალისწინებით.

2. მგზავრის გარდაცვალების შემთხვევაში, წინასწარ გადახდილი თანხა არ უნდა იყოს 16 000 SDR-ის ევროს ეკვივალენტზე ნაკლები.

3. თანხის წინასწარი გადახდა, არ ნიშნავს ავიაგადამზიდველის/მომსახურე ავიაგადამზიდველის პასუხისმგებლობის აღიარებას და შეიძლება ამ თანხიდან მოხდეს ნებისმიერი სხვა შემდგომი ხარჯების დაფარვა, საქართველოში რეგისტრირებული ავიაგადამზიდველის პასუხისმგებლობის საფუძველზე. წინასწარ გადახდილი თანხა არ ექვემდებარება დაბრუნებას, გარდა იმ შემთხვევისა, თუ თანხა გაიცა არაუფლებამოსილ პირზე.

მუხლი 4. ბარგზე ღირებულების გამოცხადება

ავიაგადამზიდველს/მომსახურე ავიაგადამზიდველს უფლება აქვს მოითხოვოს ბარგის ტრანსპორტირების დამატებითი ღირებულების გადახდა, თუ მგზავრი დაინტერესებულია ბარგის განსხვავებული პირობებით გადაზიდვით, გააკეთებს სპეციალურ განაცხადს და გადაიხდის თანხას, რომელიც უნდა შეესაბამებოდეს ბარგის ტრანსპორტირებისა და დაზღვევასთან დაკავშირებულ ხარჯებს და ხელმისაწვდომი იყოს მგზავრისთვის.

მუხლი 5. მგზავრთა ინფორმირება

1. ნებისმიერი ავიაგადამზიდველი, საქართველოში ავიაბილეთების გაყიდვისას, როგორც ავიაბილეთების რეალიზაციის ნებისმიერ პუნქტში, ასევე ტელეფონით და ელექტრონული ქსელით ბილეთების რეალიზაციისას, ვალდებულია უზრუნველყოს მგზავრებისთვის ინფორმაციის ხელმისაწვდომობა მგზავრის გარდაცვალებისას/სხეულის დაზიანებისას, მგზავრის გადაყვანის ან/და ბარგის გადაზიდვის შეფერხებისას, ბარგის დაკარგვისას, დაზიანებისას ან განადგურებისას კომპენსაციის გაცემის თაობაზე, მათ შორის, კომპენსაციის მოთხოვნისათვის წარდგენის ვადებისა და ბარგთან დაკავშირებული სპეციალური დეკლარაციის გაკეთების შესაძლებლობის შესახებ.

2. ამ მუხლის პირველი პუნქტით დადგენილი მოთხოვნების შესაბამისობის მიზნით, საქართველოში



რეგისტრირებული ავიაგადამზიდველი შეტყობინებას ახორციელებს ამ წესის დანართში დადგენილი ფორმის შესაბამისად. ამგვარი ინფორმაცია ან შეტყობინება არ შეიძლება გამოყენებულ იქნეს კომპენსაციის გასაჩივრების საფუძვლად და არც ამ წესისა და მონრეალის კონვენციის დებულებების ინტერპრეტირებისათვის.

3. ამ მუხლის პირველი პუნქტით განსაზღვრული ინფორმაციის გარდა, დამატებით, ნებისმიერი ავიაგადამზიდველი/მომსახურე ავიაგადამზიდველი ვალდებულია საქართველოში ავიაბილეთების რეალიზაციისას თითოეულ მგზავრს წერილობითი ფორმით მიაწოდოს ინფორმაცია:

ა) კონკრეტულ ფრენასთან დაკავშირებით, ავიაგადამზიდველის პასუხისმგებლობის ზღვრული ერთეულების შესახებ, მგზავრის გარდაცვალების ან ფიზიკური დაზიანების შემთხვევაში, თუ ასეთი ზღვრული ოდენობა გამოიყენება;

ბ) კონკრეტულ ფრენასთან დაკავშირებით, ავიაგადამზიდველის პასუხისმგებლობის ზღვრული ოდენობების შესახებ ბარგის განადგურების, დაკარგვის ან დაზიანების შემთხვევაში და გაფრთხილება იმის თაობაზე, რომ ინფორმაცია იმ ბარგთან დაკავშირებით, რომლის ღირებულება აღემატება დადგენილ ზღვარს უნდა მიეწოდოს ავიაგადამზიდველს რეგისტრაციის დროს ან ბარგი მთლიანად უნდა იყოს დაზღვეული მგზავრის მიერ გამგზავრებამდე;

გ) კონკრეტულ ფრენასთან დაკავშირებით, ავიაგადამზიდველის პასუხისმგებლობის ზღვრული ოდენობის შესახებ, მგზავრის შეფერხებით გამოწვეულ ზარალთან დაკავშირებით.

4. ყველა ავიაგადაზიდვისათვის, რომელიც ხორციელდება საქართველოში რეგისტრირებული ავიაგადამზიდველის მიერ, ამ მუხლის პირველი და მე-3 პუნქტებით გათვალისწინებული ინფორმაციის მოთხოვნების შესაბამისად წარმოდგენილი ზღვრული ოდენობები, უნდა შეესაბამებოდეს ამ წესით დადგენილ ზღვრებს, თუ ავიაგადამზიდველი ნებაყოფლობით არ იყენებს საკუთარი ინიციატივით დადგენილ უფრო მაღალ ზღვრულ ოდენობას. ყველა ავიაგადაზიდვისათვის, რომელიც ხორციელდება იმ ავიაგადაზიდველების მიერ, რომლებიც არ არიან საქართველოში რეგისტრირებული, ამ მუხლის პირველი და მესამე პუნქტებით დადგენილი მოთხოვნები ვრცელდება მხოლოდ საქართველოს მიმართულებით, საქართველოდან ან საქართველოში შესრულებული ავიაგადაზიდვების დროს.

დანართი
სსიპ – სამოქალაქო ავიაციის სააგენტოს დირექტორის 2019 წლის 18 აპრილის ბრძანება №78 - ვებგვერდი, 24.04.2019წ.

სსიპ – სამოქალაქო ავიაციის სააგენტოს დირექტორის 2020 წლის 8 მაისის ბრძანება №85 - ვებგვერდი, 15.05.2020წ.

სსიპ – სამოქალაქო ავიაციის სააგენტოს დირექტორის 2024 წლის 13 დეკემბრის ბრძანება №283 - ვებგვერდი, 17.12.2024წ.

მგზავრისთვის ხელმისაწვდომი ინფორმაცია

1. მგზავრის გარდაცვალების ან სხეულის დაზიანების შემთხვევაში არ არსებოს ავიაგადამზიდველის/მომსახურე ავიაგადამზიდველის ფინანსური პასუხისმგებლობის ზღვარი. ავიაგადამზიდველს/მომსახურე ავიაგადამზიდველს არ აქვს უფლება, უარყოს ან სადავო გახადოს კომპენსაციის გადახდის მოთხოვნა, თუ მისი ოდენობა არ აღემატება 151 880

SDR-ს. თუ კომპენსაციის გადახდის მოთხოვნა აღემატება აღნიშნულ ოდენობას, ავიაგადამზიდველი/მომსახურე ავიაგადამზიდველი უფლებამოსილია სადავო გახადოს იგი და ამტკიცოს, რომ ზიანი არ დამდგარა მისი ბრალეული ქმედების შედეგად.

2. მგზავრთა გადაყვანის შეფერხების შემთხვევაში კომპენსაცია შეიძლება განისაზღვროს 6303

SDR-მდე ოდენობით.

3. ბარგის გადაზიდვის შეფერხების შემთხვევაში კომპენსაცია შეიძლება განისაზღვროს 1519

SDR-მდე ოდენობით.



4. ბარგის დაკარგვის, დაზიანების ან განადგურების კომპენსაცია შეიძლება განისაზღვროს 1519 SDR-მდე ოდენობით. თუ ბარგი რეგისტრირებულია, ავიაგადამზიდველი/მომსახურე ავიაგადამზიდველი პასუხისმგებელია მისი ბრალეულობის არარსებობის შემთხვევაშიც, თუ ბარგი გადაზიდვამდე არ იყო დაზიანებული. არარეგისტრირებული ბარგის შემთხვევაში ავიაგადამზიდველი/მომსახურე ავიაგადამზიდველი პასუხისმგებელია მხოლოდ მისი ბრალეულობის შემთხვევაში.

5. ავიაგადამზიდველის/მომსახურე ავიაგადამზიდველის პასუხისმგებლობა დგება იმ შემთხვევაში, თუ იგი ვერ დაამტკიცებს, რომ ყველა ზომა მიიღო ზიანის თავიდან ასაცილებლად ან მისი აცილება შეუძლებელი იყო. ასეთი მტკიცებულების წარდგენამდე მიიჩნევა, რომ ბარგის დაზიანება, შეფერხება, დაკარგვა და განადგურება მოხდა ავიაგადამზიდველის/მომსახურე ავიაგადამზიდველის მიზეზით.

6. რეგისტრაციამდე შესაბამისი განცხადების გაკეთების შემთხვევაში და დამატებითი თანხის გადახდისას, მგზავრს შეუძლია ისარგებლოს კომპენსაციის მაღალი ოდენობით.

7. ბარგის დაზიანების, შეფერხების, დაკარგვის ან განადგურების შემთხვევაში მგზავრმა დაუყოვნებლივ უნდა განუცხადოს ამის თაობაზე ავიაგადამზიდველს/მომსახურე ავიაგადამზიდველს. რეგისტრირებული ბარგის დაზიანების შემთხვევაში მგზავრმა უნდა განაცხადოს 7 დღის განმავლობაში, ხოლო ბარგის შეფერხების შემთხვევაში – 21 დღის განმავლობაში, ორივე შემთხვევაში იმ თარიღიდან, როდესაც ბარგი გადავიდა მგზავრის განკარგულებაში.

8. თუ ავიაგადამზიდველი და მომსახურე ავიაგადამზიდველი არ არის ერთი და იგივე პირი, მგზავრი უფლებამოსილია მოსთხოვოს ზიანის ანაზღაურება ნებისმიერ მათგანს.

9. სარჩელი ზიანის ანაზღაურებასთან დაკავშირებით, წარდგენილი უნდა იყოს შესაბამის სასამართლოში, საქართველოს კანონმდებლობით დადგენილი წესით, საპაერო ხომალდის ჩამოფრენის ან გადაყვანა-გადაზიდვების დღიდან ორი წლის განმავლობაში.

